

## TAL JENTRÂ DAL GNÛF PLEVAN A VISEPENTE

«Pieri, mi ustu ben? – Mi ustu ben plui di lôr?» Cheste la domande. E la rispueste e jè clare e umane: «Signôr, tù tu sês dut: tu sâs ancje che ti vuei ben». «Alore pàs lis mêis pioris». Domande, rispueste e consegne? Dut culî.

O soi vignût in chest paîs parceche o ài rispuindût. No soi vignût a comandâ o a fâ di paron, ancje se il predi al è une cuâl autoritât.

No soi vignût a spelâus e a fâ bêz, ancje se cualchivolte, sperin pôc, mi tocjarà bati casse par cheste grande famèe che jè la glesie.

No soi vignût nancje a salvâus, ch'and'ài avonde ce salvâmi me.

O soi vignût, tal non dal Signôr, a passi cheste int cun chês peraule eterne e cun chel pan ch'al unîs e cun chel vin ch'al dà spirt e vite. O soi vignût a contaus che Diu al è pari, che nus capîs, che nus perdone, che nus spieta, che nus ûl ben e che nus ûl bogns. No podìn vê pore di lui, dopo ch'al à mandât so fî a patî par nô. Anche so vin di vê rispîet e timôr sant.

O soi vignût sicu memorie di Diu. Il mont al è distrat e i oms a son cjamâts di fastidis e dafâs e golis e vois e bramîs. E a son distrats che mai e si dismentein de robe che e dure di plui e che vâl par in eterno. Poben il predi al à di ricuardâus chestis robis culî, plui che no il pape o il vescul.

O soi vignût a vivi cun vuâtris, par vuâtris. Dut ce ch'al riguarde il paîs, al riguarde ancje la glesie di Visepente, tant il distîin eterno di cheste int come ancje il distîin di cajû. Pa la cuâl cuant che si tratarà di difindi la vite, la libertât, la dignitât, la cussiense, la storie, la culture des pioris, il pastôr nol po' tirâsi indaûr. Senò al è dome un mistirant. A cost di jessi criticât e di fâsi culachi nemî tai grancj e in chês ch'a messedin la paste, ma al è di sielgi, di judâ, di riscjâ.

No ven a judâus a murî, che par chel baste l'ore e il mâl. O ven a judâus a vivi tal rispîet di chês muse che Diu j' à parût di dâus.

No ài programs pal cjâf. Ju fasarin insieme. No ven nancje a fâ la bae ai fruts, ancje se ur vuei un ben di vite. I fruts a son impuartants, ch'a son l'avignî. Ma a son impuartants ancje i zovins e ancje i paris e lis maris, che àn la cjame de famèe e de educazion, e i nônos, ch'a son la sapiense e l'esperienze. Dut il paîs al è impuartant, come tune famèe.

E come tune famèe and'è diversitâts e difarencis, cussì and'è ancje culî. Cui le pense tun mût e cui tun âtri, seti in fat di culumie che di pulitiche che di

religjon. E ducj e àn une part di reson, parceche la reson, come la veretât e Diu, a son denant di ducj e nissun nol po' dî: "O soi jò la veretât; o soi jò ch'ò ài Diu". Partant no vin di vê pore di chêi ch'a pensin magari indifarent, magari contrâr. O vin di vê pore di chêi ch'a no pensin. O ch'a pensin dome pe lôr panse. E nancje no vin di vê pore di chêi ch'a critichin. Baste che lu fasin pal ben dal paîs. Ogni oposizion e jè gracie di Diu, parceche nus oblèe ae umiltât, ae riflession e nus pare de tentazion de prepotence e de violence so redut sui plui puars, sun chêi che no àn nissun de lôr bande, dome le passiense e une grande fede in Diu. E cun cheste fede in Diu, cu la sperance che no nus bandone, cun tun amôr grant par Lui e par ducj vuâtris ch'ò seis diventâts aromai la mê famèe e il gno dut, il gno onôr e la mê crôs, o scomenci chest toc de mê vite, voltant pagjne. O alci i vôi viers il cîl par domandâ il jutori dai nestrîs Sants; prin di dut de Madone e po' di Sant Valentin e po' ducj i nestrîs sants di cjase e i predis che àn servide cheste glesie e che jò o stoi cjapant sù ce che lôr e àn semenât cun sudôrs e lagrimis.

Alore, fradis di Visepente, us racomandi: no steit a vê pore di Diu; no steit a vê pore di Crist; no steit a vergognâsi de vuestre storie e de vuestre anime furlane. No steit a vê pore des difarencis: Il plui biel sardin al è chel ch'al à plui cualitâts di rosis. E dutis e àn di componisi te unitât e te veretât.

No steit a spietâsi meracui e nancje no a pratindju. O sai che mi voleis zà ben, di cuanch'ò ài metût pît. Cumò mi sta a mi di meretâmal. E preait pal vuestri plevan o siôr Santul, come che mi clamavin i miei fruts e la mê int di Cjargne là ch'ò ài lassade la mê zoventût e part dal gno cûr. Preait par che, dopo di vêus predicjât a vuâtris, jò no resti escludût de pâs dal cîl che ducj o smicjìn. Al sares di ridi a viodi a jentrâ dentri ducj e il plevan fûr de puarte.

No sai ce tant che il Signôr mi lassarà culî né se la mê strade e sarà facil. Il Signôr nus domande impegno, cussiense, testimoniance, buine volontât. Une robe sole nus impromet: che dut ce che mi sucederà di ben e di mâl, di salût o di malatie, j al ufrîs al Signôr par vuâtris, un par un e ducj insieme.

Il bon pastôr al dà la sô vite pes sôs pioris. Jò no soi il bon pastôr, ch'ò soi dome un puar om, ma però la mê vite le ài zà metude a vuestre disposizion cun dut il cûr e cun dute l'anime. E il Diu de pâs, de buine volontât e de misericordie ch'al conpagni i nestrîs pas in chest mont e in chelâtri. Amen

pre Antoni Beline, plevan

Visepente, ai 27 di jugn dal 1982